

IN MEMORIAM

08.06.2007.

Dragi naš Izo,



Ljudi se sastaju u različitim situacijama i sa različitim povodima. Mi, tvoje kolege sa posla, prijatelji, komšije i rodbina smo danas došli tužnim povodom da te posljednji put ispratimo na vječni počinak. Niko od nas još uvijek ne može da vjeruje da te nema. Još prekjučer si pošao na službeni put, na svoj uobičajeni radni zadatak kao i mnogo puta do sada.

Zar je moralo da dođe do tragične saobraćajne nesreće na mostarskom raskršću, blizu grada, napovretku kući?

Vjerovatno da svako od nas ima svoju sudbinu.

Poštovani prijatelji,

Naš Izet je rođen u Žilićima kod Goražda 28.marta 1955. godine. Završio je 1974. godine Srednju građevinsko-geodetsku školu u Sarajevu i kratko vrijeme radio je u Geodetskom zavodu BiH, ali je iste jeseni upisao geodetski smjer na Građevinskom fakultetu u Sarajevu. Kao diplomirani inženjer geodezije zaposlen je u "Energoinvestu" - "Higrainžinjeri" od 09. januara 1981. godine pa do svoje tragične pogibije.

Tokom svoje uspješne karijere, sticao je sva stručna zvanja od pripravnika do odgovornog projektanta. Također, povremeno je bio angažovan na poslovima asistenta na Građevinskom fakultetu u Sarajevu i predavača na Srednjoj građevinsko-geodetskoj školi u Sarajevu. Odrđeno vrijeme proveo je na "Energoinvestovim" gradilištima u Libiji.

Geodetski poslovi kojima se naš Izet bavio su veoma značajni u projektantskoj organizaciji kakav je "Energoinvest". Od ideje do realizacije svakog objekta neophodno je stalno prisustvo geometara na lokaciji objekta, također nakon izgradnje potrebno je stalno osmatranje ponašanja objekta u prostoru i vremenu. Geometri su prvi koji odlaze na obično nepristupačan teren, pripremaju podloge za projektovanje, a zatim prate napredovanje radova, sve dok objekat ne bude pušten u funkciju. Samo projektanti sa kojima je naš Izet radio znaju značaj geodetskih podloga, jer su bez njih iluzorni projektni poslovi, a time i izvođenje značajnih industrijskih objekata, koji su realizovani u našoj zemlji.

Poslovi kojima se rahmetli Izet bavio su vezani za primjenjenu geodeziju i za najznačajnije hidrotehničke i industrijske objekte projektovane i izgrađene u našoj zemlji; HE Grabovica, Salakovac, Mostar, Orlovac, Mobaya u Zairu, HE Glavatičevo, Konjic, Crna Rijeka, brane Rama, Vrba, termoelektrane Ugljevik, Gacko, Tuzla, Glinica Zvornik, rudnik olova i cinka Srebrenica, brojne regulacije rijeka i potoka, objekti komunalne infrastrukture – vodovodi, kanalizacije i mnogi drugi.

S obzirom da se naš Izet isticao peciznošću i pedantnošću u radu, njemu su povjeravani veoma važni projekti snimanja, proračuna i interpretacija iz oblasti tehničkog osmatranja svih hidrotehničkih objekata u našoj zemlji.

Vrijeme agresije na našu zemlju Izet je proveo u rovovima na Špicastoj stijeni, nesebično braneći svoj grad i svoju porodicu.

Iako je po prirodi svog posla često morao biti odsutan od svoje porodice, rahmetli Izet je na svoj način pokazivao izuzetnu ljubav prema supruzi Minki i sinovima Arminu i Admiru.

Nadamo se da će Izetovi roditelji, majka Fatima i otac Kasim naći snage da prebole tragediju koja se dogodila njihovom sinu.

Dragi Izo,

Sudbina je htjela da tvoje plemenito srce prestane da kuca u srijedu 06.06.2007.godine. Mi ćemo nastaviti da radimo posao koji se zove projektovanje, u kojem si ti bio punih 25 godina, ali u svim našim budućim projektima biće i dio tvog znanja i iskustva.

Ti bi najbolje znao da za nas koji se bavimo projektovanjem nema većeg priznanja od toga da se pozivaju na naš projekat i da je taj projekat izveden. Mnogi industrijski objekti koji su izvedeni znače da nismo uzalud radili i živjeli, jer u svaki od njih ti si zajedno s nama ugradio sebe. Brojni telefonski pozivi i telegrami od naših poslovnih prijatelja koji su iskreno zaprepašteni tvojom tragedijom potvrđuju sve naše najbolje uspomene koje si ostavio.

Svi mi nastojimo da život proživimo časno i pošteno. Ti si nam bio dobar primjer. Zato, neka ti je vječna hvala i rahmet tvojoj plemenitoj duši.

Fahrudin Đuzo